

*Evelyn Wever-Croes (MEP):*

## Danki Gobernador Freddis Refunjol den number di henter pueblo di Aruba y di e gran famia di MEP

**ORANJESTAD** –Parlamento den un reunion solemne diamars ultimo a tuma despedida di Sr. Freddis Refunjol. Lider di fraccion di MEP, Evelyn Wever-Croes, a duna un discurso na e ocasion ey cu a toca hopi curason.

“Den number di pueblo di Aruba en general, di e famia di Movimiento Electoral di Pueblo en especial y muy en especial den number di e pueblo di Savaneta, mi ta gradici y felicita Sr. Refunjol pa e forma digno y excelente cu el a ehecuta e cargo di Gobernador.

Un carera sirbiendo comunidad di Aruba, cu a cuminsa

desde su entrada den mundo di enseñansa algun aña pasa, sigui pa su entrada den politica na aña 1983, cu a permiti e ocupa varios funcion, den Parlamento di Aruba y den Gobierno di Aruba. Tambe a traves di deporte el a sirbi comunidad, den su tempo liber, practicando deporte, y tambe yudando y guiando hobenan den deporte, siendo asina un ‘role model’ pa nan.

12 aña y 8 luna pasa Sr. Refunjol a wordo proponi pa Sr. Nelson Oduber, prome minister e tempo ey, como candidato di Gobierno di Aruba pa Gobernador. Algo sigur historico mirando cu Sr. Refunjol tabata den e mundo

politico. Sinembargo, debi na e persona di Sr. Refunjol, un hende di tur hende, un hende di integridad intachabel, y un Arubiano di curason, e proposicion aki a wordo carga pa tur partidonan politico di Aruba, y a wordo acepta pa e tempo ey, Reina Beatrix como e representante di Reino na Aruba y esey ta algo hopi grandi.

E forma con Sr. Refunjol a desplega su cargo di Gobernador tabata un forma digno y excelente. Tur hende ta pasa, durante su carera, den momentonan bon, bunita y momentonan menos bon, bunita; y ta e forma con bo ta reacciona ta defini bo, como

ser humano y como profesional, como representante di Reino aki na Aruba. Indudablemente e momento cu a defini e carera di Sr. Refunjol, tabata na momento cu e mester a atende cu e crisis den Reino na juli 2014, cu a desemboca den e Koninklijk Besluit, y mes momento atende cu e crisis nacional cu e welga di hamber y protesta di manifestantenan rabia dilanti di su oficina. Na e momentonan ey Sr. Refunjol a demostra grandesa y clase, y a ehecuta su responsabilidadnan cu dignidad di cual awe henter Aruba ta hopi orguyoso di dje.

Esaki ta locual ta defini Sr.

Refunjol su trayectoria como Gobernador, y tambe su legado. Sr. Refunjol a sa di converti un carera politico, culmina cu e trayectoria como Gobernador, den algo hopi bunita. Esaki ta e legacia di Sr. Refunjol, y ta un inspiracion pa mi persona, y pa mas politico. Mi ta gradici tambe Sra. Refunjol, y famia pa e permiti Sr. Refunjol dedica su bida na sirbi nos comunidad. E respet y aprecio cu tin den henter nos comunidad pa Sr. Refunjol y su famia, sigur ta algo di ta hopi orguyoso di dje. Cu Dios bendicion’e y su famia den futuro”, tabata palabranan di Sra. Evelyn Wever-Croes, lider di MEP.